



REPUBLIKA E SHQIPËRISË
KËSHILLI I LARTË GJYQËSOR

Nr _____ prot

Tiranë më _____.____.2024

VENDIM

Nr. 309, datë 25.06.2024

PËR
PRANIMIN NË SHËRBIMIN CIVIL GJYQËSOR TË Z. {...}, PËR
POZICIONIN NDIHMËS LIGJOR NË NJËSINË E SHËRBIMIT LIGJOR
PRANË GJYKATËS SË APELIT TË JURIDIKSIONIT TË PËRGJITHSHËM

Këshilli i Lartë Gjyqësor, mbështetur në nenin 147/a, pika 1, shkronjat “d” dhe “ë”, të Kushtetutës së Republikës së Shqipërisë, në nenet 61, 90, pika 1, shkronja “c” dhe “h” dhe 97, pika 1, shkronja “a”, të Ligjit nr.115/2016 “Për organet e qeverisjes të sistemit të drejtësisë”, i ndryshuar, në nenet 36 dhe 42, pika 1, të Ligjit nr. 98/2016 “Për organizimin e pushtetit gjyqësor në Republikën e Shqipërisë”, i ndryshuar, në Vendimin e tij nr. 424, datë 12.10.2020, “Për procedurën e verifikimit të kushteve dhe kriterëve ligjore të rekrutimit të kandidatit për kancelar, për këshilltar ose për ndihmës ligjor”, si dhe vendimin nr. 751, datë 28.03.2024 të Komisionit të Pavarur të Kualifikimit, lidhur me konfirmimin në detyrë të subjektit të rivlerësimit, Z. {...}, me detyrë ndihmës ligjor, aktualisht pranë Gjykatës së Apelit të Juridiksionit të Përgjithshëm, pasi shqyrtoi relacionin dhe materialet përkatëse, mbi propozimin e Komisionit të Planifikimit Strategjik, Administrimit dhe Buxhetit,

VERËN:

I. MBI FAKTET E PROCESIT PËR PRANIMIN NË SHËRBIMIN CIVIL GJYQËSOR TË Z. {...}

1. Me Urdhër nr. 51, datë 03.06.2015 “Për emërimin e ndihmësve ligjor” të Kryetarit të Gjykatës Administrative të Shkallës së Parë Tiranë, Z. {...} emërohet në detyrë si Ndihmës Ligjor pranë Gjykatës Administrative të Shkallës së Parë Tiranë, mbështetur në nenin 6, pika 1 të ligjit nr. 49/2012 “Për Organizimin dhe funksionimin e gjykatave administrative dhe gjykimin e mosmarrëveshjeve administrative” i ndryshuar;
2. Me vendim nr. 577, datë 20.11.2020 “Për emërimin e përkohshëm të Z. {...}, në pozicionin Ndihmës ligjor në Njësinë e Shërbimit Ligjor pranë Gjykatës së Apelit Tiranë” të Këshillit të Lartë Gjyqësor deklarohet ndërprerja e marrëdhënies së punës pranë Gjykatës Administrative të Shkallës së Parë Tiranë dhe emërimi i përkohshëm në Njësinë e Shërbimit Ligjor pranë Gjykatës së Apelit Tiranë.
3. Verifikimi i pasurisë dhe figurës, një tjetër kriter që duhet për plotësimin e kushteve për emërimin si ndihmës ligjor, konsiderohet i përmbushur, referuar Vendimit nr. 751, datë 28.03.2024 të Komisionit të Pavarur të Kualifikimit, mbi konfirmimin në detyrë

me vendim përfundimtar të organeve të rivlerësimit kalimtar, në përputhje me nenin 165, pika 9, të Ligjit “Për statusin e gjyqtarëve dhe prokurorëve në Republikën e Shqipërisë

4. Me Vendimin e tij nr. 424/2020, “Për procedurën e verifikimit të kushteve dhe kriterëve ligjore të rekrutimit të kandidatit për kancelar, për këshilltar ose për ndihmës ligjor”, Këshilli ka filluar procedurën e verifikimit të Ndhmësave Ligjor që konfirmohen në detyrë me vendim përfundimtar të organeve të rivlerësimit kalimtar, në përputhje me nenin 165, pika 9, të Ligjit “Për statusin e gjyqtarëve dhe prokurorëve në Republikën e Shqipërisë”, dhe që kanë të drejtën e caktimit në një pozicion si nëpunës civil gjyqësor në sistemin gjyqësor që i përshtatet më së miri profilit aktual të kandidatit dhe për të cilin përmbush kriteret.

II. VLERËSIME TË KËSHILLIT MBI PRANIMIN NË SHËRBIMIN CIVIL GJYQËSOR TË Z. {...}

5. Këshilli vlerëson se një ndër përgjegjësitë e tij të ngarkuara nga Kushtetuta e Republikës është dhe ajo lidhur me drejtimin dhe kujdesjen e mbarëvajtjes së punës në administratën e gjykatave, bazuar në nenin 147/a, pika 1, shkronja “d” dhe “ë”, ku theksohet se (citojmë): “1. Këshilli i Lartë Gjyqësor ushtron funksionet e mëposhtme: ... d) drejton dhe kujdeset për mbarëvajtjen e punës në administratën e gjykatave, me përjashtim të mbarëvajtjes së strukturave të teknologjisë së informacionit në gjykata, e cila rregullohet me vendim të Këshillit të Ministrave; ë) ushtron funksione të tjera të caktuara me ligj.”
6. Në Ligjin për Pushtetin Gjyqësor, i ndryshuar, që në nenin 1, pika 1, shkronja “d”¹ është parashikuar se një ndër qëllimet e tij kryesore është edhe përcaktimi i rregullave lidhur me statusin e nëpunësve civilë gjyqësor. Edhe në nenin 50 e në vijim, deri në nenin 63, të këtij ligji i dedikohet pikërisht statusit të nëpunësve civilë gjyqësor në gjykatë. Në këto dispozita², lidhur me organin kompetent për pranimin në shërbimin civil gjyqësor, për kategoritë kancelar, këshilltar ligjor në Gjykatën e Lartë dhe ndihmës ligjor në gjykatën e shkallës së parë dhe gjykatën e apelit është ngarkuar të jetë Këshilli i Lartë Gjyqësor. Kjo kompetencë është e sanksionuar në nenin 59 të këtij ligji ku theksohet se “1. Organi kompetent për emërimin e kancelarit, këshilltarit dhe ndihmësit ligjor është Këshilli i Lartë Gjyqësor.”
7. Lidhur me kriteret e përgjithshme që duhet të plotësohen për ndihmës ligjor, ligji parashikon si të tilla, të njëjtat kriteret e përgjithshme që duhet për pranimin në shërbimin civil, të parashikuar në legjislacionin për nëpunësin civil, ndërkohë që si kriteret e veçanta për këtë kategori, kategorinë e ndihmësit ligjor në gjykatat e shkallës së parë dhe gjykatën e apelit, ligji i parashikuar në pikën 2 të nenit 56 të Ligjit Për Pushtetin Gjyqësor, i ndryshuar dhe që janë (citojmë): “2. Për pozicionin e ndihmësit ligjor në gjykatat e shkallës së parë dhe apelit, kandidatët duhet të përmbushin këto kriteret e veçanta: a) të jenë diplomuar në drejtësi në nivelin “Master shkencor”, të barasvlershëm me të, sipas përcaktimeve të legjislacionit të

¹ Neni 1, pika 1, shkronja “d” e ligjit nr.98/2016 parashikon se: “1. Objekt i këtij ligji është përcaktimi i parimeve të përgjithshme dhe i rregullave në lidhje me: ... d) statusin e nëpunësve civilë gjyqësorë.”

² Neni 50 I ligjit nr.98/2016, i ndryshuar parashikon se: 1. Kategoritë e nëpunësve civilë gjyqësorë janë: a) kancelari; b) këshilltari ligjor në Gjykatën e Lartë; c) ndihmësi ligjor në gjykatën e shkallës së parë dhe gjykatën e apelit; ç) kryesekretari; d) sekretari gjyqësor; dh) nëpunësi i financës dhe buxhetit; e) nëpunës të tjerë që punojnë në fushat e kërkimit ligjor dhe dokumentacionit, burimeve njerëzore, teknologjisë së informacionit, arkivit dhe marrëdhëniet me publikun, me jashtë ose me median. 2. Statusi i nëpunësve civilë gjyqësorë rregullohet nga ky ligj.

arsimit të lartë; b) të kenë përvojë profesionale jo më pak se tre vjet, si nëpunës në sistemin gjyqësor ose të prokurorisë, në administratën publike, profesionet e lira ligjore, mësimdhënie në fakultetet e drejtësisë, ose në çdo pozicion tjetër të barazvlefshëm me to, në sektorin privat ose në organizatat ndërkombëtare”.

8. Bazuar në këto kritere të mësipërme, lidhur me plotësimin e kritereve të pranimit në shërbimit civil gjyqësor të kandidatit Z. {...}, evidentojmë faktin se, lidhur me kriterin: a) *të jenë diplomuar në drejtësi në nivelin “Master shkencor”, të barasvlershëm me të, sipas përcaktimeve të legjislacionit të arsimit të lartë; referuar dokumentacionit të depozituar nga Z. Celiashi, rezulton se:*

- Ka përfunduar Fakultetin e Drejtësisë, në Universitetin e Tiranës, në vitet 2001-2005;
- Ka përfunduar Fakultetin e Shkencave Politike, në Universitetin e Tiranës, në vitet 2005-2010 (Bachelor dhe Master Shkencor);
- Ka përfunduar Master Shkencor në “E Drejtë publike”, në Universitetin European të Tiranës në vitin 2010;

Gjithashtu, lidhur me kriterin, b) *të kenë përvojë profesionale jo më pak se tre vjet, si nëpunës në sistemin gjyqësor ose të prokurorisë, në administratën publike, profesionet e lira ligjore, mësimdhënie në fakultetet e drejtësisë, ose në çdo pozicion tjetër të barazvlefshëm me to, në sektorin privat ose në organizatat ndërkombëtare”, rezulton se:*

- Me Urdhër nr. 51, datë 03.06.2015 “Për emërimin e ndihmësve ligjor” të Kryetarit të Gjykatës Administrative të Shkallës së Parë Tiranë, Z. {...} emërohet në detyrë si Ndihmës Ligjor pranë Gjykatës Administrative të Shkallës së Parë Tiranë, mbështetur në nenin 6, pika 1 të ligjit nr. 49/2012 “Për organizimin dhe funksionimin e gjykatave administrative dhe gjykimin e mosmarrëveshjeve administrative” i ndryshuar;
- Me vendim nr. 577, datë 20.11.2020 “Për emërimin e përkohshëm të Z. {...}, në pozicionin Ndihmës ligjor në Njësinë e Shërbimit Ligjor pranë Gjykatës së Apelit Tiranë” të Këshillit të Lartë Gjyqësor deklarohet ndërprerja e marrëdhënies së punës pranë Gjykatës Administrative të Shkallës së Parë Tiranë dhe emërimi i përkohshëm në Njësinë e Shërbimit Ligjor pranë Gjykatës së Apelit Tiranë.

9. Në zbatim të Vendimit nr. 424, datë 12.10.2020 “Për procedurën e verifikimit të kushteve dhe kritereve ligjore të rekrutimit të kandidatit për kancelar, për këshilltar ose për ndihmës ligjor”, pika 130 “Ndihmësi ligjor që konfirmohet në detyrë me vendim përfundimtar të organeve të rivlerësimit kalimtar, në përputhje me nenin 165, pika 9, të Ligjit “Për statusin e gjyqtarëve dhe prokurorëve në Republikën e Shqipërisë”, ka të drejtën e caktimit në një pozicion si nëpunës civil gjyqësor në sistemin gjyqësor që i përshtatet më së miri profilit të tij aktual dhe për të cilin përmbush kriteret” dhe pika 131 “Kërkesa për t’u caktuar në një pozicion si nëpunës civil gjyqësor në sistemin gjyqësor paraqitet përpara Këshillit brenda një muaji pas bërjes përfundimtar të vendimit të organeve të rivlerësimit kalimtar. Në këtë rast marrëdhënia e punës së ndihmësit ligjor në gjykatën përkatëse të apelit mbaron në momentin e marrjes së vendimit për kërkesën e paraqitur nga ai sipas kësaj pike”, Z. {...} ka depozituar, pranë Këshillit të Lartë Gjyqësor, kërkesën për caktim në pozicion në shërbimin civil gjyqësor.

10. Nga ana e Këshillit konstatohet se Z. {...} ka paraqitur kërkesën e regjistruar me aktin nr. 2972 prot., datë 31.05.2024, në të cilën shprehet interesi për pranim në shërbimin civil gjyqësor, në pozicionin Ndhmës Ligjor në Njësinë e Shërbimit Ligjor pranë Gjykatës së Apelit të Juridiksionit të Përgjithshëm.
11. Për shkak se Z. {...} ka shprehur interesin për emërimin në pozicionin Ndhmës ligjor në Njësinë e Shërbimit Ligjor pranë Gjykatës së Apelit të Juridiksionit të Përgjithshëm dhe pasi ka plotësuar të gjitha kriteret dhe kushtet e parashikuara nga ligji për këtë pozicion, Këshilli ka detyrimin të bëjë emërimin në këtë pozicion. Ndaj për këtë qëllim është e nevojshme të shihet organika e Gjykatës së Apelit të Juridiksionit të Përgjithshëm lidhur me organizimin dhe numrin e ndihmësave ligjorë. Neni 42 i Ligjit për Pushtetin Gjyqësor parashikon, organizimin dhe funksionimin e Njësisë së Shërbimit Ligjor pranë gjykatave të shkallës së parë dhe apelit, njësi e cila përbëhet nga *ndihmësa ligjorë, e krijuar me Vendim të Këshillit të Lartë Gjyqësor*.
12. Nga dokumentacioni që disponohet nga Drejtoria e Burimeve Njerëzore, pranë KLGJ-së konstatohet se në organikën e Gjykatës së Apelit të Juridiksionit të Përgjithshëm lidhur me pozicionin “ndihmës ligjor” ka në përbërje 32 të tillë, nga të cilët në detyrë, në momentin e marrjes së këtij vendimi janë 20 ndihmës ligjor, përfshirë edhe Z. {...}.
13. Lidhur me emërimin e ndihmësit ligjor, referuar Vendimit nr. 424, datë 12.10.2020 *“Për procedurën e verifikimit të kushteve dhe kriterëve ligjorë të rekrutimit të kandidatit për kancelar, për këshilltar ose për ndihmës ligjor”*, pika 139 *“Në rast se përpara Këshillit, në të njëjtën kohë, janë për shqyrtim disa kërkesa për caktimin në të njëjtin pozicion të të njëjtës gjykatë, nga kategoria e ndihmësve ligjorë të konfirmuar në detyrë me vendim përfundimtar të organeve të rivlerësimit kalimtar, ato shqyrtohen nga i njëjti relator. Caktimi në pozicion në këtë rast bëhet mbi bazë konkurrimi. Këshilli zgjedh kandidatin, duke marrë parasysh kriteret e mëposhtme sipas kësaj radhe: a) renditjen e tyre në testin e aftësive profesionale në Shkollën e Magjistraturës, të zhvilluar sipas parashikimeve të Ligjit “Për rivlerësimin kalimtar të gjyqtarëve dhe prokurorëve në Republikën e Shqipërisë”; b) çdo njohuri ose përvojë të veçantë të kandidatit, që e bën atë veçanërisht të kualifikuar për vendin e lirë; c) vitet e përgjithshme të përvojës profesionale në sektorin e drejtësisë ose në pozicione drejtuese”*. Kjo procedurë e parashikuar nga ligji mban në konsideratë rastin kur kemi më shumë kandidatë sesa vende vakant të lirë, ndërkohë në rastin konkret, të emërimit të Z. {...}, për sa kohë ushtron funksionin aktualisht në Njësinë e Shërbimit Ligjor në Gjykatës së Apelit me Juridiksion të Përgjithshëm, procedura e zgjedhjes e parashikuar nga pika 139, e vendimit të sipërcituar nuk ka gjen për t’u zbatuar.

III. KONKLUZIONI

14. Në gjithë sa më sipër, duke konstatuar se Z. {...}, plotëson kriteret e përgjithshme dhe të veçanta të pranimit për nëpunësit civil gjyqësor në kategorinë “ndihmës ligjor”, në kushtet kur ai është konfirmuar në detyrë me vendim përfundimtar të organeve të rivlerësimit kalimtar, në përputhje me nenin 165, pika 9, të Ligjit “Për statusin e gjyqtarëve dhe prokurorëve në Republikën e Shqipërisë”, dhe që kanë të drejtën e caktimit në një pozicion si nëpunës civil gjyqësor në sistemin gjyqësor që i përshtatet më së miri profilit të tij aktual dhe për të cilin përmbush kriteret, si dhe kur aktualisht ushtron funksionin pranë Njësisë së Shërbimit Ligjor në Gjykatën e Apelit me Juridiksion të Përgjithshëm, Këshilli vlerëson t’u pranohet në shërbimin civil gjyqësor,

për pozicionin e ndihmësit ligjor në Njësinë e Shërbimit Ligjor pranë Gjykatës së Apelit me Juridiksion të Përgjithshëm.

15. Për shkak të kushteve dhe nevojave që ka Gjykata e Apelit me Juridiksion të Përgjithshëm, ku kontributi i ndihmësve ligjorë konsiderohet i rëndësishëm, vlerësohet që ushtrimi i veprimtarisë së Z. {...} në këtë gjykatë të fillojë menjëherë.

PËR KËTO ARSYE:

Këshilli i Lartë Gjyqësor, mbështetur në nenin 147/a, pika 1, shkronjat “d” dhe “ë”, të Kushtetutës së Republikës së Shqipërisë, në nenet 61, 90, pika 1, shkronja “c” dhe “h” dhe 97, pika 1, shkronja “a”, të Ligjit nr.115/2016 “Për organet e qeverisjes të sistemit të drejtësisë”, i ndryshuar, në nenet 36 dhe 42, pika 1, të Ligjit nr. 98/2016 “Për organizimin e pushtetit gjyqësor në Republikën e Shqipërisë”, i ndryshuar, në Vendimin e tij nr. 424, datë 12.10.2020, “Për procedurën e verifikimit të kushteve dhe kriterëve ligjorë të rekrutimit të kandidatit për kancelar, për këshilltar ose për ndihmës ligjor”, si dhe vendimin nr. 751, datë 28.03.2024 të Komisionit të Pavarur të Kualifikimit, lidhur me konfirmimin në detyrë të subjektit të rivlerësimit, Z. {...}, me detyrë ndihmës ligjor, aktualisht pranë Gjykatës së Apelit të Juridiksionit të Përgjithshëm, pasi shqyrtoi relacionin dhe materialet përkatëse, mbi propozimin e Komisionit të Planifikimit Strategjik, Administrimit dhe Buxhetit,

VENDOSI:

1. Pranimin në shërbimin civil gjyqësor të Z. {...}, në pozicionin Ndihmës Ligjor në Njësinë e Shërbimit Ligjor pranë Gjykatës së Apelit të Juridiksionit të Përgjithshëm.
2. Efektet juridike të këtij vendimi, përfshirë dhe ato financiare, fillojnë menjëherë.
3. Një kopje e vendimit të arsyetuar i njoftohet Z. {...}, sipas kërkesave të nenit 98 të Ligjit nr. 115/2016 “Për organet e qeverisjes së sistemit të drejtësisë”, i ndryshuar, si dhe Gjykatës së Apelit të Juridiksionit të Përgjithshëm.
4. Kundër këtij vendimi mund të bëhet ankim, brenda 15 ditëve nga data e njoftimit, në Gjykatën Administrative të Apelit.

Ky vendim hyn në fuqi menjëherë dhe botohet në faqen zyrtare të internetit të Këshillit të Lartë Gjyqësor, pasi të redaktohet për sigurimin e anonimatit të subjekteve.

PËR KËSHILLIN E LARTË GJYQËSOR